

四庫全書

集部

欽定四庫全書

敬業堂詩集卷十四

翰林院編修查慎行撰

湓城集

起壬申正月盡七月

庚午春朱恒齋由刑部郎出守九江枉書見招踰  
年始往踐約既為輯廬山志復遂廬山之游賢地  
主之貺我良厚矣

禾中與德尹別

四海皆兄弟何人似卯君也知年向老不合手頻分夜

夢留殘月春帆感斷雲得歸吾早決負土共成墳

時方計先

人葬事

吳江留別張弘蘧庶常

南風激船如釋箭片帆曉發平湖縣百六十里半日程

第四橋邊一相見開懷各話別中事蒼狗浮雲凡幾變

三年善病君差強君但憂貧不憂賤我今落魄仍江湖

明朝又欲西辭吳酌君之酒與君別楊花拂頭鬢雙雪

夾浦橋阻風

夾浦橋南客棹孤  
雨聲連夜洗平蕪  
東風吹淺吳江水  
半作春潮漲太湖

山塘晚霽

最好停橈近酒家  
放晴天氣日初斜  
盆梅謝後蘭芽茁  
正月蜂聲未鬧花

曉渡西泖回望宜興縣郭

櫓聲西入蝦籠嘴  
波面微微過泖風  
濃日吐烟烟吐樹

浮圖一角是城東

蝦籠嘴西  
沈港名

高淳

縣小無城郭橋長即水門魚蝦腥作市鵝鴨鬧如村  
曲檣隨岸叢叢柳抱園漸知江路近盈縮視潮痕

渡蕪湖關

兩槩前頭水勢寬曉風吹得敝裘寒漸空杼軸憐民困  
老閱波濤信路難此去罟師聊作伴從來漕吏必嘲官

時官舫為  
津吏所阻

篋中一卷彈箏集忍對江山制淚者

自此西  
上皆已

未夏秋間與先兄韜荒同遊  
地也彈箏集兄紀遊篇名

### 荻港人家杏花

輕舸細雨江村路過眼東風見杏花  
略似小車逢綺陌  
不知紅艷屬誰家

### 雨中過銅陵

沙尾沿流曲作堤青山一半吐城低  
洲空亂雁爭歸北  
路轉千帆盡向西正剪渡時風乍漲  
最含烟處柳初齊  
客程已厭連朝雨不要春鳩更苦啼

雨後望九華山

橫者不與側者同，九朵芙蓉並插空。  
去鳥已衝殘雨沒，歸雲忽漏夕陽紅。  
劈開華掌層層翠，使盡湘帆面面風。  
終是詩人言語大，攜來直欲置壺中。

東坡名仇池石為壺中九華

荷葉洲對雪

在大通對岸

梅根浦口風尤緊，荷葉洲前雪正濃。  
兩岸曉雲深似墨

一條春水健如龍

唐羅隱曾卜居九華山下梅根浦。按圖經：江水歷李陽河，經梅根口，銅陵

縣今大通有水自九華山麓出江，即此也。

雪晴池陽舟中

曉行池陽路霽景豁清美江南江北山照影同一水半  
銜殘雪白半揷斷霞紫眼前有奇句只在空濛裏我懶  
吟未成風吹櫂歌起

大風至劉婆磯

江脉忽掉頭微動青玻璃俄看黑雲起遙指天南陔須  
臾墜我前橫截江兩涯拔江噴作雨白日潛光輝初疑  
鼇山傾又若鯉窟移舉舟向空擲綆斷誰能縻長年束



手嘆有力不得施而我于中流高枕故咏詩明知怖無  
益聊復忍少時男兒可憐蟲造物終見慈既濟乃思痛  
嗒焉中心脾投文訴江神略陳危苦辭水從西南來風  
亦西南吹誰歟激使怒若是不可磯自我涉江湖十三  
年于茲南浮及北渡履險間有之此胡太酷烈性命輕  
嶮巖仕宦涉江來揚帆若揚鬢船尾點畫鼓船頭掉黃  
旗大賈涉江來滿載居羸竒放溜如放馬控縱從人馳  
我船何所載載書載鴟夷壓浪一葉輕疾行固其宜如

何強弓彎寸進恒苦遲神于我乎薄厚彼寧獨私咄哉  
窮旅人初受俗眼嗤揶揄到五鬼漸漸伺路歧惟神實  
正直倚賴相扶持今朝大戲劇漂泊將誰依禱罷似有  
感撫枕魂依稀神來入我夢責我大有詞風水渙成文  
變化豈汝知滔天初濫觴至險出坦迤汝以耳目料何  
異握管窺汝又好遠遊遠遊計終癡萬里走從軍還家  
仍布衣十年就場屋逐衆趨京師人皆取巍科三黜名  
獨遺謂宜自揣量息影甘荆扉茲來非宦遊又非競刀

雖皇皇義奚取放浪形骸為汝居頗有園園中頗有池  
好風皺池面浮花舞漣漪此豈有驚波來溷汝息機汝  
自捨之出去安而即危不聞南山躋下有季女饑不見  
東海畔中有踏浪兒兩者聽自取決擇休然疑叩頭謝  
江神痼疾神所治大夢喚初覺行當早旋歸

題樅陽旅壁

噩夢驚回路已賒  
舸船上櫓伊鴉  
青山繞屋無修竹

山皆危石  
不產竹

紅袖當壚有杏花  
野渡漸生沿岸火  
春流未

沒去年沙綠楊影裏初弦月人隔烟江正望家

田間先生聞余至自青山命駕來會喜賦

春風弭楫向樅陽舊約多年不敢忘

先生在都下送余南歸詩有秋到皖

江尋舊好可能一問白頭來之句

四海平交無行輩兩朝軼事在文章

從知老境難為客誰與先生特置鄉一片青山高插漢  
巋然真似魯靈光

花朝晴示僧道楷

初日烘雲碎作霞討春人競出江涯老來不喜閒桃李

別約山僧看菜花

自樅陽至楊樹灣道中即目

併日春光鬪物華，馬頭胡蝶太夭斜。誰知駭綠紛紅候，

還有春風未放花。

義津橋外見碧桃  
一樹猶未放花

三角潭

春禽交交鳴綠楊，征夫辨色早束裝。前行十里霧未醒，  
驢尾秃速驢耳長。朦朧人語遙喚渡，約略村落開微陽。  
烟光兩岸溪一曲，樹影四匝潭中央。菜畦麥隴桃李徑，

高間紅白低青黃新鵝野鴨好毛羽拍拍飛出沿方塘  
田家之樂樂何限頓令過客忘他鄉只愁霧重天欲雨  
橫策又上黃茅岡

桐城謁左忠毅公祠

祠在縣治  
東數十步

歷歷三朝事他時髮指冠賢人當橫決國勢必摧殘俎  
豆新楹肅乾坤正氣完如何鄉後輩偏有孔都官

謂懷  
寧也

過田間先生山居相留信宿出示藏山集再賦

二詩博和

層巒俯瞰萬松梢中有高人舊結茅自入鹿門詩一變  
竟馴龍性易初爻雲盤遠勢鴉翻陣花作新泥燕補巢  
未免累翁雞黍約往還原不拒貧交

比似仙源那易尋避人畢竟要山深誰教鶴怨猿啼客  
來聽鸞歌鳳舞音語雜談諧皆典故老傳著述豈初心  
好看龍馬精神健東武時為抱膝吟

三江口苦雨

那刹磯頭雨殺風千檣烟氣濕濛濛楚天低壓平蕪外

何處青山認皖公

大雪渡馬當

卧看穿雲日色黃  
起聞鯨吼北風狂  
新詩也得江神助  
雪打春帆渡馬當

順風揚帆時閉目  
靜聽如空山梵唄  
殊有會心  
破浪風前萬鼓鳴  
喧囂原向靜中生  
無心只作深山聽  
一樹松濤起梵聲

與九江太守朱恒齋



一麾暫出領名邦九疊屏山九派江正喜為郎猶未老

早聞治行已無雙謳歌滿境鷄音革軒冕巡城虎氣降

時有虎至郊外君移  
文城隍神一發殪之

依舊官居精典籍只多鈴卒晝敲

柳

二虎歌 并序

壬申正月有兩虎闖入九江西門外龍開河傷一人

已而逸去市人惴惴恐其復至朱恒齋太守齋戒為

責躬文翼日大會屬負於城隍廟

即漢將  
軍灌嬰

及宋大夫

祠下

漢九江守宋均

既焚牒告神則命虞人挾弓矢火器窮

追之期於必獲越五日殫其一至是盡殲焉黃質黑  
章猙獰可怖聚而觀者數千人咸謂使君至誠感神  
能力除民害也適余至九江目覩其事作歌以俟采  
風者

湓城連山猛獸多兩虎突入龍開河腥風悵悵日杲杲  
白晝市上無人過使君視民如赤子威鳳生儀麟有趾  
豪強斂戢盜賊清爾獨何為至於此灌將軍廟宋公祠

能捍大患則祀之撞鐘伐鼓會僚佐第一先焚責已辭  
與神後先俱守土政拙慚余不如古愛其父祖及子孫  
忍界孱人飽虓虎明朝大獵城南闔毛風血雨迷荆榛  
特開一面縱雉免死不當罪傷吾仁須臾虎自林中出  
小者先擒大者逸雖擒一虎戕一人其勢公然兩相敵  
此時伐罪更有名合圍再往大掩羣潮州鱷魚必盡殺  
不信請讀昌黎文虞人眼疾如鷺鳥餘勇登崖鬪牙爪  
咆哮一聲山忽裂火箭飛空碎其腦黑章黃質毛斑斑

旗杠壓肩奏凱還，猶防作力斷。急縛血色併出雙睛間，  
道傍觀者爭太息。自古神功扶正直，百年兇暴一朝除。  
此事知公有陰德，江邊戶戶皆椎牛。從此山無樵采憂，  
詩成大笑冠纓絕。我正欲作匡廬遊。

廬山之遊未果呂灌園有詩索和

峩峩指雲峯，拔地幾千丈。仙靈晦高節，元氣棲蒼莽。朝  
來雲抹腰，露頂氣一爽。蓮花本無蒂，蒸出仙人掌。拂鏡  
眼雙明，扶烟鳥孤往。勿嗟遊未到，遐矚寓心賞。但恐身

入山依然結塵想

西門之役既連斃二虎矣後五日復獲虎子二

呂灌園作後二虎歌再次其韻

虞人入山官吏賀擣穴成擒無小大盡將醜類肆市朝  
不許兇雛草間卧去如烈火歸如風覆巢破卵五日中  
獻肩獻蹤來接武貫蝨精神用強弩擔頭縛作春筍斑  
一一竒毛入官府餘威假托雖有徒不聞王政寬無辜  
賊吾民者殺無赦別有淵藪容逃逋弱食頗分強者肉

倚伏機難論禍福春行秋令公所憐陰雨隨車洗餘毒  
是日大雨以寬濟猛在酌宜潁川有鳳方來儀殺胎豈惟禁  
獵戶竭澤兼欲防漁師庶幾百物稱蕃息童子仁心使  
君德我為此語非養奸若是兇豪須斂跡

楊花同恒齋賦

散作輕埃滾作團不成花片但漫漫春如短夢初離影  
人在東風正倚欄微雨乍粘還有態柔條欲戀已無端  
祇應老眼憐輕薄長自摩挲霧裏看

初聞黃鸝次灌園韻

一聲流過小窓前去國關心又一年  
圓入客吟同宛轉  
熟聞鄉語倍纏綿  
畫樓脉脉通春夢  
碧樹茸茸暮曉烟  
為是好音須愛惜  
自憐終勝受人憐

同呂灌園鄒仙來諸君遊甘棠湖登烟水亭次  
壁間舊韻

長烟濛濛水澹澹  
草色波光晴颭灩  
廬山翠掃兩角雲  
倒瀉杯中青  
一片舊開小閣壓  
紋縠時見飛帆掣  
流電

背郭人如燕雀稀  
點沙舟與鳧鷖亂  
地偏絲管曲嘈雜  
市遠塵囂風截斷  
可憐俗眼競喧湫  
誰肯清遊期汗漫  
同時數子興不淺  
佳句澄鮮分謝練  
莫辭勝境日日往  
預恐萍跡紛紛散  
何當春酒變成湖  
醉過鶯花三月半

東坡送劉景文詩云春酒一變甘棠湖自  
注云景文卜居九江近甘棠湖即此地

琵琶亭次宋郭明復舊韻

春江帶城沙嘴白  
弓勢彎環抱新月  
我來縱棹半日遊  
敗意眼前無一物  
吟詩直入老僧家  
小技忽癢難搔爬



分明有句和不得古調豈叶箏琵琶先生不作誰與語  
白日茫茫變風雨男兒失路雖可憐何至紅顏相爾汝  
與公相去又十年依舊荒城無管絃掃空題壁孤亭在  
笑指門前浪拍天

江州雜咏四首

依舊江關俯麗譙居人指點說天橋

明太祖破江州事

戰迴左

蠡軍容壯鑿斷殘岡霸氣銷

東門外有天子堂相傳劉誠意惡陳友諒都此得勝

地故鑿之

鎮將南朝偏跋扈部兵西楚最輕剽

指左良玉表繼成事自

從血洗孤城後九派空回寂莫潮

天文容易掃欃槍隣郡猶傳戍鼓鳴

戊辰夏楚盜破武昌黃州

鴉鵲

自朝英布廟

北門外九江王廟至今血食

魚龍曾擾灌嬰城紛紛設

險寧論地往往時危獨被兵

按史自北宋以來凡四屠城

四十三年

休養力不知何福享承平

峭削峰巒北面當雲頭一半割南康高僧舊入遺民社

世業誰當佚老堂三劫烽烟埋洞壑百年文物遞滄桑

名山志在真難續或有竒蹤墮渺茫

時余方輯廬山志

別開官署射亭傍一角頽城壓短墻螺髻浮青虛劔匣

府署正對雙劔峯宋乾道中蜀人唐立方闢地作二城轟樓其上謂之劔匣見程史雉媒平綠展

越塲船稀小步初移市客上高樓必望鄉

樂天詩三百年來庾樓上

曾經多少望鄉人  
庾樓直府署北

添得黃蘆侵岸濶舊遊回首獨神傷

余已未壬戌  
兩經此郡

余作江州雜詩灌園既垂和續為潯陽行感慨

淋漓讀之使我心惻因推本其意再成長律四

十韻首言風土次序東晉以後迨明初二竊

據事終於寧南乙酉之禍此州被亂情形始末  
略備休養生息其在斯時乎並邀恒齋太守同

賦

鼓角悲涼地山川要害城一州當孔道萬里控江程近  
楚風猶悍吞吳氣未平鳧鷖飛易散魚鮪竄多驚戶少  
移恒業田硤廢力耕兒童知矢石婦女識旗旌不諒流  
離苦翻疑性命輕舊文徵史冊殘局愴棋枰置郡名長

易

秦為九江郡漢屬吳國三國初屬武昌後置潯陽郡  
晉改江州梁移九江治湓城唐宋為江州建炎後陞

定江軍元置江州  
路明為九江府

封王面或黥

謂英布

大都當用武未有

不稱兵建業朝廷小潯陽肘腋并中原方轉鬪南服暫

維寧草草圖王計寥寥伐叛聲奸雄雖反覆使相必忠

貞間倚屏藩重頻扶鼎鼐傾

晉末昌中陶侃領江州平王敦咸和中溫嶠義兵由

潯陽趨建業新蕪峻隆安中劉毅何無忌輩敗桓玄于岷嶲洲梁承聖中陳霸先以江州刺史定侯景之亂

艱虞經剝運成敗付閒評是物闕天授伊誰敢力爭每

聞稱僭竊旋見就擒烹

宋泰始元徽中晉安王子勛桂陽王休範梁天監中刺史陳伯

之俱以江州反未幾就平南宋建炎中李成陷江州為張峻岳飛所敗元至正二十年陳友諒以江州為都國

號漢改元大  
義尋戰死

昨者民何罪今來憤尚盈

以下專指左良玉屠城事

勤

王須奉檄犯闕爾無名灞上隨兒戲洄中笑客迎

崇禎甲申

良玉避流賊鋒欲遁九江遊擊胡以寧鈞致之住闕廂  
一年已而返武昌至乙酉春監軍御史黃澍偽藏太子  
詔召良玉入攻馬士英良玉信之  
遂於三月二十七日移兵至九江  
將軍停鎧仗辨士絕

冠纓

柳敬亭為良玉幕客事具吳梅村集

勿戢兵猶火搜牢地盡阮

初良玉發

武昌挾楚督袁繼咸以往至是與繼咸標將郝二連營  
九江城外四月初四日遂縱兵焚掠殺男女二十餘萬

摧殘鋒太酷屠戮禍交櫻漂血長溝赤燒空烈焰晴押

網連萬艦

宋曹翰屠江州取廬山東林鐵羅漢五百歸潁州調巨艦滿載金帛時號押網羅漢

甲拔諸營作俑歸曹翰

江州屠城自翰始前此未有也

貪狼甚李成

即宋

建炎中反賊

天誅旋幸伏

兵發九江良玉以氣塞死舟中

殺氣驟難清落籍

銷灰劫招魂異死生若非敷大澤何以起疲氓牙蘖枝

初發勾尖草乍萌及時資愛養太守賴廉明冷署依雙

劍

名峯

顏垣寄一楹涉園除瓦礫課僕種蕪菁耗折空餅

粟支吾折脚鐺官貧仍逆旅吏隱亦柴荆曉雨排衙坐

春田露冕行設施看次第氣象卜豐亨蟋蟀還農俗琵琶

遣宦情篇成聊紀實大雅待君賡

石鐘山

鄱陽吞天來噴薄南出口江流不能敵抵北乃東走懸  
崖峙西灣水勢掃如帚孤城艮其背外捍賴兩肘靈區  
聚神奸石狀雜妍醜平鋪理橫截旁罅中劈剖熊羆饑  
攫人竒鬼起援手蜂窠掛篙眼烏卵破壘缶一一皆下  
垂中空無一有有時應鞞鞞照影見星斗忽然風喧  
聲作蒲牢吼年深追蠹壞兼恐石斷紐惜哉坡公記石  
刻泐已久

蘇公石鐘山記舊刻於南鐘石上明  
正統己巳石裂仆於水今失其處矣

茫茫宇



宙間孰是真不朽

月夜自湖口泛舟還湓城同恒齋太守賦

空江夜東注月光似俱流  
舉頭看青天水去月自留  
移帆忽西向月又隨我舟  
而月豈有心適與吾目謀  
澄觀得靜趣含景無停休  
不辭川路長獲此清夜遊  
遠樹小池口孤鐘鎖江樓  
須臾燈燭光候騎迎沙頭  
誰知太守樂夢亦同鳧鷗

春晴曲效温飛卿體

朝陽透簷鵲聲喜烟外遊絲風綽起馬拂花髮驕欲嘶  
招招酒旆垂楊裏蕉衫荀屐稀出城上樓曉看南山晴  
平春遠綠望不到一幅錦機新織成江聲剪斷尋芳徑  
九派澄光鑄明鏡柳花散作千點萍日夜東流知水性  
三月十七夜與恒齋月下論詩

庾公樓外月飛光上雲崖此時兩相對此景良自佳我  
挾山野性尋君到衙齋不棄貧賤交酌唱晨夕偕脫略  
分雖忘終不雜恢諧所尚在文字虛受非擊排縱論古

與今瀉胸走江淮力欲追正始旁喧厭淫哇向來風騷  
流汎濫無津涯可傳必有故長松出樊柴明明正變途  
花葉殊根莖須求作者意勿使本分乖新詩壓時賢高  
朗洵少儕當與古爭勝拾級已得階人言簿書煩正坐  
乏雅懷君懷皎如月塵霧其能埋

魚苗船

幾片紅旗報販鮮魚苗百斛楚人船憐他性命如針細  
也與官家辦稅錢

曉晴味恒齋庭下芭蕉

放晴天色愛清朝閒赴風前翠袖招忽見主人窓下綠

始知夜雨為芭蕉

杜牧詩主人窓外有芭蕉

九江向無鱗魚網戶忽獲一尾以饋太守晚餐  
分噉作三絕句

鮰魚子鱗賤如毛何物能令市價高從此溢城添水產  
白頭春浪出銀刀

四月家鄉記飽餐朝來指動豈無端似防遠客歌彈鋏

破例相隨過鴨欄

鮒魚不過鴨欄驛以魚隨湖上潮到小孤輒回也

三百錢償一尾鰓擊鮮原不累民間可知太守清如水  
豈在懸魚絕往還

署庭蓄錦雞且一年朝來忽飛去恒齋有詩屬

和

為爾無端惜剪刀養成六翮竟如逃啄餘香稻新拋粒  
收得雕籠舊落毛羣入家雞終不亂飛隨野鶴便能高  
人間是處多羅畢文繡深林好自韜

明日吏人以錦雞來視之即昨逸去者再作一首

勿論城市異山林性在終知去意深  
誤啟樊籠驚遠舉特憐毛羽募生擒  
舊曾相識緣文彩待爾重來伴苦吟  
從遣周防是誰過主人從不起猜心

初夏坐烟水亭望廬山二首

一奩明鏡挿芙蓉積雨初晴翠靄濃  
萬疊好山看未足又添雲勢作奇峰

分明寫入畫圖工倒影看來上下同忽失水中山一半  
浪紋吹皺日高風

余方輯廬山志擬入山訪舊蹟頻為雨阻恒齋  
有作和之

日日開軒對翠氛勝遊偏阻鹿麋羣不愁溢浦長多雨  
但恐匡山化作雲紀事欲真須眼見異書難便信傳聞  
一條柳標從僧乞可要籃輿累使君

芭蕉恒齋再索和

一葉復一葉自然成綠陰後先如有序舒卷豈無心漸  
覺空庭窄能添曲徑深野人新得句題罷亦長吟

夜夢入廬山桃花滿谷一僧指云此杏林也因  
誦樂天遊大林寺絕句夢中了了醒而以詩紀  
之即用白韻

指點仙家手自栽桃花却傍杏林開眼前一笑真成幻  
公是身遊我夢來

午酒初醒



兀兀醺醺坐日斜  
爽神全賴閒林茶  
三竿砌竹搖風影  
一箭盆蘭得氣花  
夢枕易消非實境  
丹爐難轉是年華  
江城節物闕何事  
催得遊人獨憶家

生日書感

落拓差堪比牧之  
江湖曾費十年詩  
早衰鬚髮非無故  
暗減心情只自知  
酒盞每逃狂客座  
杖藜將赴老僧期  
尚慚習氣除難盡  
間與人爭劫後棋

梅雨二十二韻和灌園

五月潯陽雨蛟龍正鬱蟠地浮三楚濶雲納九江寬暴  
漲搖城郭餘波溢井榦鄱湖連浩淼廬阜失巘岼鳴鶴  
翻依樹飛魚不上竿及時陰已動退位火疑殘天氣昏  
連曉人情暖易寒蚊飛偏攪晝蛙鬧故侵官舊縷蛛穿  
網新泥蝘築壇竹皮流薄粉桐乳墜輕丸蕉翠宜沈綠  
榴紅信渥丹濕螢光皦短菴鵲羽毛乾柳壞蟻螯匿墻  
空蜥蜴鑽案蠅沿硯水穴鼠嚙盆蘭物理尋常見詩聯  
貼妥難爐香縈几席徽黥上衣冠不出拋芒屨無聊却

扇紈老嬾書幌暗病覺布衾單水簟涼貪睡琴絃緩廢  
彈入舟同寂莫著屐試蹒跚直欲登樓去還從倚檻看

空濛雖變態縹緲必竒觀

寓居近在庾樓下  
而不得登故云

雨中廬山僧書至

社裏何時著少文書來猶未斷聲聞千峰濕翠隨行脚  
帶雨開緘一屋雲

階除積水課力疏下流放之射圃隙地

尺寸階前地無源本易盈只應兼土濁那得入江清曲

折隨人意高低驗物情下流荒圃在吾枕厭蛙鳴

曉吟

江聲入戶竹風急樹影過牕山月斜誰共此時留此景  
殘更煞後未啼鴉

次灌園潯陽唱和賦感見贈二十四韻

大火方司令餘威未解嚴夕陽明杲杲殘雨過靈靈書  
少渾難借棋低又嬾拈移時看燕乳隨意聽魚噉圃廢  
閒誰治江喧近可嫌談諧須得伴興會賴相兼洗甕晨

浮蟻推窓夜候蟾學禪根器鈍鬪韻筆鋒銛鄉信燈空  
卜歸期夢代占山中俄換葛野服待分縑我氣貧旋挫  
君懷老益謙悲歌翻變壯醉語誤疑譔鴻爪泥長印蛛

絲羽易黏勝遊宗炳畫往事季心鉗

灌園為吳江大司馬之子甲申以後

因亂破家

止沸吹蠶冷焚枯過劫炎乾坤全晚節耕鑿合窮

櫛

君有別業在玉屏山中

爛熳三秋菊崢嶸百歲枿以閒聊送老

所得詎為廉幸舍猶彈缺成都想下簾商聲流石齒仙  
氣入霜髯高浪晴湖濶竒雲夏岫添掉頭隨去住放跡

等飛潛澗壑終難返塵埃久屬厭天涯同拙滯吟罷寸  
心悵

江漲八韻

頗怪連宵雨重雲尚合圍忽聞溢浦水已上庾樓磯急  
鼓爭趨陣高春怒發機九龍多被譴萬馬孰能韉魚健  
衝人過鷗輕踏浪飛淘沙原自濁流惡想尤肥幸勿侵  
三版還防沒半扉村橋新漲好吾欲放船歸

余所居名  
橫漲橋

晚晴

曉愁暴漲與堤平意外斜陽得晚晴小閣放教雙燕出  
高梧忽帶一蟬鳴便思對酒難消暑若要看山合上城  
狼藉殘雲飛不盡江空留作斷霞明

連日苦雨江勢轉盛聞小池口一帶已成巨浸

感賦

見說黃梅縣連朝浸渺瀰雨中隄盡壞江口地尤卑農  
事侵饑溺天心望轉移可憐闕隴旱竭澤正斯時

午後有人自廬山來云昨日白龍潭起蛟故水

暴漲

瀑布聲中雨瀉檐  
洪流百道走城南  
山橋衝斷採樵路

歸報夜來龍洗潭

廬山大雨驟至  
人謂龍洗潭

曉霽望南昌歸信

十日荒城聽雨聲  
壞墻前後露株楹  
蛇因亂草當階卧  
蝸是空坳積水生  
喜動眉間看曉色  
夢于枕上算離程  
故應乾鵲知人意  
已報歸期又報晴

桐陰和灌園



積雨晴來暑倍加  
午陰端愛片時遮  
展開踈簟三間屋  
掃過空庭半月花  
清露欲流濃作乳  
碧天初洗澹無霞  
如何葉底留蟬蛻  
長聽高吟在別家

試奕次灌園韻

澹墨行踈紙  
畫枰兩人隱  
几亦忘情  
總饒老手通盤算  
只似兒曹鬪草贏  
角上紛紛排陣蟻  
睫前擾擾過飛蟲  
莫嗤當局同遊戲  
得失心空始不爭

夜熱不成寐  
聞秋蟲聲

循環造化機陽壯陰已伏不知昆蟲智何以先草木我  
亦化中人投閒如病鹿日長貪午枕夜睡馬能熟賴是  
心寡營未妨羣動觸徘徊風露下大火西流速須臾雞  
三號細響猶斷續誰能將此意寫入玲瓏曲

樂天玲瓏曲云黃雞

惟曉卯時鳴白  
日催年酉時沒

### 一草亭後補築土墻同灌園越秀賦

缺後方思補誰防未雨時大都勞版築不過當樊籬儉  
與茆亭配低于菜圃宜墻頭環埤留看一帆移

墻北  
面環

城  
堞

月夜得南昌消息知恒齋歸期猶未定

客來依地主主去客翻留萬事盡如此一官難自由日  
長愁過夏夜靜漸知秋若上滕王閣休忘庾亮樓

蟬蛻和灌園韻

不應已蛻尚名蟬彈指難留過去緣枯比老僧初入定  
輕如羽客乍登仙誰云解脫非生理始信飛鳴是後天  
從此塘螂無攫意機心不上七條絃

除草

病暍貪微涼空庭方夜坐蚊雷來茂草一唱千萬和誰  
能忍痒肌委身飼羣餓可憐蜘蛛巧布網僅如磨暗飛  
餘地多舐觸凡幾個老夫為暫避竒計出高卧除惡務  
其源攻先窟穴破披衣早起刈草僕晨課一聞奏刀  
聲快若風雨過非云迹盡掃但使勢少挫滋蔓或養奸  
斯言可喻大

灌園用瓷盆斟水浮以花片畜魚苗其中作案

頭清玩索余賦之戲成二絕句

詩翁六十如兒戲，一勺分江几案間。少片壺中九華石

湖口李正臣蓄異石名壺中九華東坡山谷皆有詩配他剩水作殘山

魚吹花瓣亦生瀾，水擊鵬飛一樣寬。下得南華新注脚，藕絲針孔是奇觀。

露坐待月

城頭待月月未出一線飛光曳長白，明朝有客渡湖來。

湖面應添落星石

苦旱

積雨乃祈晴久晴廼望雨如何望雨意止在驅炎暑難  
將田野情一概例官府江流空浩浩不救稊與黍南山  
昨日雲竚待商羊舞狂飈忽捲散吹井作乾土朝來禱  
龍祠會衆伐大鼓此邦歲早獲隣郡給商賈六月合嘗  
新過時恐無補可憐關中旱移粟累晉楚糧船從東來  
輓送方接武時方輓運入楚漕艘家家募丁壯日日候江滸寧知  
餽運人自迫忍饑苦天心莽難測含痛向誰語

起最早

竹亭宜早起獨自繞廊行  
漸覺月光淡不知天色明  
草長兼露重庭曠得風輕  
墻缺廬山好峰峰似染成

冒風渡湖口

湖欲與江合江猶吞吐間  
浪頭千點白一點是鞋山

立秋夜彭澤舟中

斗柄轉城頭江聲健入秋  
若逢明月夜應作小孤遊  
水柵依茆屋風帆帶荻洲  
半年遷客夢星露警扁舟

雨後登彭澤北山佛閣

眼界江天濶登臨即大觀雲根連地拔山勢讓城寬路  
險苔偏滑風涼汗易乾夕陽紅欲墮好是獨凭欄

彭澤縣雨中望小孤山

龍城望小孤巖樹近可數何來雲一片遮斷蘆花渚遠

勢入微茫彭郎磯外雨

龍城彭澤驛名

七月初三夜

七月初三月如弓未上弦涼風彭澤柳遠火望江船不



作披衣坐聊為枕柁眠傍人多笑我辜負早秋天

時余微病

卧早

秋暑

大火初流暑未清長川落日正西傾氣蒸遠水浮天動  
血染殘霞照夜明蟋蟀豈知催雨意蒹葭只慣報風聲  
故鄉消息經時斷白髮無端一夕生

發彭澤紀事和恒齋

吳楚西來太驛騷亂帆啣尾上千艘戍旗不動方傳箭

秋水初平尚滿槽

樂天詩江  
鋪滿槽水

樹豁忽疑遙岸盡天長不

覺遠山高民間疾苦原難悉移粟徒煩

睿慮勞

遊下石鐘題山響樓壁

牛羊滿山似可驅鞭之不動非石乎懸崖無根乃有株  
老榦亂拔千章榆嵌空樓閣凌紫虛列仙遠邀山澤臞  
落星如漚漂大孤五老拱揖朝香爐沙洲鎖斷九江脉  
正面全受鄱陽湖湖波本清如碧矚下流盡被江所污

是日大風聲拔木洪濤倒挾雷霆趨須臾風止平若鋪  
細聽林籟鳴笙竽石鐘非鐘叩亦愚孰辨清越分涵胡  
作詩一笑解者無四壁自看江山圖

江聲閣次家聲山壁間舊韻

勿將架構擬人工百尺高樓萬里風彭蠡遠帆斜出口  
匡廬晴翠淡粘空涼生欄檻秋先爽助得江山句轉雄  
好是不題名姓在免教僧費碧紗籠

王令詒自吳淞至溢城連牀話舊驚聞錢越江

學士京邸訃信悲感交集卽事成詩

急雨渡江來蕭然挾秋氣清風偕好友一夕千里至殘  
燈照黃昏梧葉響階砌荒城忽連榻此會出不意可憐  
窮旅人一笑天併忌新歡猶未極旋隕傷心淚憶昨客  
京華青衫最憔悴髯公獨好我不與時並棄往往合酒  
徒開懷使沈醉江湖莽回首已若隔生事那復承訃音  
嗚呼別離地君頭絲欲換余齒豁已墜浮生知幾何聚  
散逆難計吟蛩耿敗壁達旦兩無寐

宋中丞牧仲自江西移撫江蘓邀余入幕投詩  
辭之

此遊本意因廬嶽半載逡巡未謁公擬束歸裝向湓口  
送移旌節赴江東空煩使命雲霄上豈有人才道路中  
敢謂山林便野性倦飛無分借秋風

同王令詒泛甘棠湖至城南謁陶白祠

艇子打兩槳剪風如燕梢白鷺導我前行行入蘆茭古  
祠晝常啟不待遊人敲門前十畝田

按碑記云有田十畝即以給居僧


夏旱土不膠牛宮柱歌側旁種苦葉匏居僧老業農叱  
犢犂黃茅苦云生理拙歲歲山田燒入門風氣道沙水  
互畏包湖光隱林杪山色遮城堦天然好位置結構宜  
檜櫟緬懷二先生潛見各一爻潔身苟有歸千載應神  
交如何斗室中湫隘溷庖誰能移佛座勿令名實淆

正室三間中設大士像而二公祠  
反在其左與僧厨偏處殊不稱也

送令詒歸青浦即次留別原韻

遠別無善地况乃當湓城送客不思鄉此語非人情鄉

心我久發非緣送君生輸君後我來竟復先我行大江  
秋滾滾日氣昏離程斷雁思舊侶閒鷗狎新盟茫茫對  
岐路歸計何時成



敬業堂詩集卷十四

欽定四庫全書

集部

敬業堂詩集卷十五  
十六

詳校官左中允<sub>臣</sub>瑯五珠

助教<sub>臣</sub>常循覆勘

總校官庶吉士<sub>臣</sub>倉聖脉

校對官庶吉士<sub>臣</sub>吳裕德

謄錄監生<sub>臣</sub>徐瑤



欽定四庫全書

敬業堂詩集卷十五

翰林院編修查慎行撰

雲霧窟集

壬申八月

二月杪抵九江即擬作匡廬之遊因循至秋仲恒齋為余聚半月糧遂策杖往自化城北登山南下舍都口循麓而歸凡十餘日得詩七十首身在雲霧中仍恐未識廬山真面目也

遊廬山道中寄恒齋太守

山行宜寂寞獨往翻躊躇一遇同遊人

謂王琴村

決起興有

餘頗累賢地主聚糧辦籃輿曉來風色好初日明烟墟  
千巖排空來勢若掖以趨但聞空翠裏竹樹聲踈踈  
我  
今心力衰事事不迨初預愁無傑句何以酌匡廬

經周濂溪先生廢祠

尼山大聖人重去父母邦人情非得已孰肯違故常先  
生少而孤依舅居丹陽母歿即葬此後乃官南康官貧

久不歸遷柩於九江仁心重廬墓卜築匡山傍托名寓  
濂溪中豈忘故鄉同時往還輩無若蘓與黃猶不諒此  
意作詩徒誇揚我來千載後拜公謁祠堂荒畦被秋禾  
四野烟茫茫湓城賢太守為政持大綱度地面三峰種  
蓮池中央煌煌謚告石舉廢今方將時恒齋捐俸  
重創書院願備  
洒掃人幸勿揮門墻

### 太平宮

北風江上來吹瓦墮屋角牛羊入廢觀古木一鳥啄問

此宅何神其來已渺邈肇興自唐代廟貌遞樸斲

唐開元中

封廬山神為  
采訪使者

上古神靈封每視三公爵東西南北中嵩

岱恒華霍廬山雖僻左不得列五岳傲然踞江湖氣象  
頗卓犖無端加秩祀屈首受正朔山靈恐未甘孰與一  
丘樂黃冠那解此意在崇榱桷昏昏入醉夢舉世呼不  
覺神來風綽幡神去雲解駁下視九萬空紛紛蜩與鸞

東林寺

連山袞袞來陡起山門前頑空被偏塞失却東南天石

稜瘦筋露磣道枯縷懸不知何峰水流作溪橋泉入門  
尋斷碑古蹟想白蓮同時十八人縛律如坐禪飲酒不  
入社淵明豈非仙

題遠公影堂後水壺泉

影落空堂不記年依然冰雪照蒼顏定嫌人世江湖濁  
莫放清流更出山

宗雷禪師索贈

荔枝塔古名僧少誰是堂中十九賢好乞謝公池畔水

為師重長一枝蓮

題東林方丈

浮嵐疊翠偏崔嵬三面周遮一面開我欲向西添小閣

盡邀九十九峰來

株嶺一帶在寺西若置一閣名九十九峰亦絕勝也

三笑堂書阮亭先生題壁後先生題志云乙丑

新正四日同里阮亭王某奉

命祭告南海過東林三笑堂觀故友東癡先生題詩為

之憮然詩載南海集中

聽雨軒中昨曾宿虎溪橋東今又過謝靈運屐去已久  
蘓子瞻詩留不多兩袖攬雲獨惆悵一燈照壁猶吟哦  
沙彌竊聽傳怪事大笑此客如風魔

西林寺贈魯宗上人

夕陽在西林孤塔支青天中有六朝寺鬪古不鬪妍樹  
頭一朵雲渡水俄為烟老僧送客罷倚樹聽涼蟬

遺愛寺小憩

侍御遺踪已久蕪盤盤樵路極縈紆萬竿藏塢初迷寺

一筧分泉直到厨勝地乍來忘過客衰年漸欲信浮屠  
木樨香裏逢僧話舊事三生記得無

香爐峰下尋香山草堂故址

古寺折而南一峰矗香爐北有草堂址荒榛穴鼯鼯白  
公真天人笑傲凌中區本挾烟霞性歷遊仕宦塗當其  
卜築時意已忘羈孤人生營菟裘寧必皆故廬等是有  
興廢此中別賢愚

上化城



懸崖多烈風石縫樹不長怪此獨雄拔枝枝蔽穹蒼路  
轉倍蕭森古陰暗虛廊鳥巢不敢寄一一皆下翔我亦  
難久留毛孔森開張翻思風雨會快受六月涼

由關門石步行十里登大林峰

此來為遊遨忽迫失足慮中情一恇怯進退兩失據墮  
雲如奔逃片片掠面去霞標尚天半欲到苦難遽松根  
絡崩巖怒石虎蹲踞隨身賴竹杖將伯倘予助移時陟  
層顛鸞鶴似可御眼前少行輩坐長丈人倨登頓方自

茲休矜最高處

講經臺次昌黎遊青龍寺韻

城中望山如握管寸碧抽蓼目光短罡風掣我絕頂來  
地少雲多鋪滿滿一條江水拖細綫四面天形罩圓傘  
鶴經枯樹或墮翎龍去空潭不貽卵何人結茆荒山顛  
米罄齋厨爨長斷豈惟米罄水亦竭兼值今年連月旱  
秋陽炙背汗透衣客到苦催供茗盃老禪對客大嗚噓  
指說茲遊太荒誕休誇筋力尚有餘應慮頽年行莫纂

陸機賦傷頹  
年之莫慕

偶然饑渴所不免前路茫茫預難莫資生

破寺例乞食此去深山漸無伴雨襟風帽好自擔垢脚  
鰲顏向誰澣奔馳不定覺客忙應接無端累我懶白頭  
住山年六十投老安心就閒散芒鞋不踏戶外塵坐看  
嶽崎化平坦遠公歿後經臺廢世外名僧近尤罕談天  
高論久寥寥一聽清言真欸欸此來得此吾有幸大似  
冬寒變暄暖好奇歷險亦何為語不在多微中窺浮情  
一半為芟除相別出門行步緩

推車嶺

奮身出絕險，深入得平地。  
玩情忘安危，履險識難易。  
憑高試北望，來路直如棄。  
枯株盡僵仆，樵採遠莫致。  
野火歲燒林，虎狼何處避。  
前山有厲禁，僧律嚴於帥。  
漸入翠

微天濛濛雜烟氣

自此至天池皆禁山矣

大林寺岡上人茅齋

盤烟下層霄，山骨微負土。  
陰陰日光澹，漠漠風氣古。  
寶樹壓橋低，一溪環菜圃。  
香山舊吟地，花徑羨宿莽。

白樂天曾

於此四月看桃花  
其地猶名花徑

廢寺亦荒涼半間用茅補孤清耐久

坐客至何必主林靜無匿聲虛簷應樵斧

### 洪武御碑歌

昇仙臺前白玉碑柱石擎攫龍之而鴻文載在御製集  
初不假手詞臣為我來摩娑一再讀顛者蹤跡大可疑  
憶昔元人失其鹿羣雄角逐爭驅馳濠州布衣人未識  
芒碭雲氣常隨之金陵一朝定九鼎六合不足煩鞭笞  
是時楚兵最剽悍不自量力來交綏國家將興有先兆

天遣來告貞元期明明天眼識王氣故以險怪驚愚蚩  
英君往往謀略秘計大不許尋常窺亦如田單破燕騎  
神道設教尊軍師不然茲事乃近誕小數何足誇權竒  
白旄一麾江漢靖軍前長揖從此辭留侯自伴赤松去  
穀城空立黃石祠天池之山高巍巍竹林仙馭杳莫追  
鶴歸倘記石華表世代已逐滄桑移百年雨露在山澤  
惟有松栢叅天枝

循佛手崖觀竹林寺石刻至訪仙亭

何年鑿渾沌洞戶啟虛牝瞰空飛瓏玲萬古凝不隕泉  
蒸濕氣成一一結芝菌其西勢陡絕難以尋丈準天窄  
忽倒垂地豁平野盡寸人不點目寸樹如束笋遠視入  
毫芒俯身迫窮窘傍崖嵌樓閣側背削蒼隼青鸞十萬  
隻掉尾掃欄楯竹林疑有無仙者蹟久泯短生寄長世  
局躋良足憫如何不自廣蟠螭同螭蚓御風倘可行吾  
意欲遠引

天池寺

西跨馬鞍脊東拊五老背廣袤四十里南北兩交會地  
界畫雲霞岡形走杉檜架空營紺宇巨麗一山最佛皆  
鑄金為殿用鐵瓦蓋象筵及法供半出尚方賚琉璃百  
盞燈光燭楚天外鳴鐘集萬指部牒領司會音膾當時曠  
蕩恩池水亦霽霈神仙事渺茫崇飾母已太爾來漸凋  
耗隙影過塊塏殘僧四五人被衲嬾結帶天池旱亦涸  
磴道入蔚蒼獨客來登臨嗒馬發深慨窮陰蓄邃谷瑟  
瑟響秋籟



聖燈巖

見說文殊谷神燈照夜明山僧從未見高卧過三更

趙忠定公廢祠在天池塔傍

丞相塔前

塔為韓侂胄所建故俗呼丞相塔

丞相祠千秋興廢偏同時

我來弔古一惆悵青史賢奸僧不知

敝封寺瞻赤腳塔

自從蛟拔門前樹水氣猶腥一派泉萬瓦盡隨飛雨去

孤鐘空向廢堂懸

三年前寺傍起蛟以百數殿瓦悉為所掣惟存屋柱而已

泥金塔

縫風吹裂映竹窓櫺日射穿不用琳宮更巍煥御碑原

自配羣仙

赤脚僧天池四仙之一也

下擲筆峰渡將軍河抵黃龍寺觀明慈聖太后  
所賜紫衣經幢及元人十八羅漢畫像

危峰拔竒峭挿漢秋崢嶸下走數千尺此身疑被阨溪  
流寬且長潭影黝而清飛泉濺我領過山猶水聲漸入  
漸無蹊蒼松與雲平萬枝皆直上曲木何由萌入林見  
精藍御扁題有明勅建自神母谿達開朱甍一道護藏

碑蛟龍拱函經架裳垂頻婆錦繡揚旛旌新如手未觸  
機上初織成元人留畫圖用意填丹青年深彩色退神  
氣逾發生劫火焚天池赧封亦頽傾黃龍獨無恙故物  
猶充盈得非深山中呵禁趨百靈勿輕現光怪恐使神  
鬼驚

金竹坪

水緩山舒一徑分叢篁夏翠晚氤氳秋陰非雨亦非霧  
嵐氣似烟還似雲偃蓋松低從蘚蝕藏經函古費香熏

內官死後茅菴廢好事僧稀失舊聞

明萬曆中有太監劉姓結茅於此今

菴廢  
址存

太乙峰西麓有蘆林亦靜者之居也

誰將半幅江湖景移置千峰最上頭  
撥觸遊人動歸興  
蘆花風裏屋如舟

自舍鄱嶺下東行至蚱蜢嶺望大小漢陽諸峰

已近匡南道紆迴下嶺行路尋松鼠跡  
山占草蟲名曉

露沾衣重秋風信杖輕翠屏圍合處  
遙指仰天坪

在漢陽峯

上廬山  
最高處

八九疊谷循觀山  
麻姑崖經屏風  
疊上一綫天  
會日暮不及觀  
三疊泉而返

信書不如無身  
歷解其故  
好奇輕坦道  
冒險犯迷路  
廬山載圖經  
絕勝因瀑布  
三疊尤稱雄  
此來期勇赴  
尋源既已得一壑  
經屢渡波濤  
所衝撞石滑  
不留步荒榛  
或刺眼蛇蝮  
時挂樹雲屏  
橫我前陰瀨  
風逾怒偕行  
率興盡深入  
獨無怖漸上  
一綫天團團  
失四顧日光  
所不到

勃窣但烟霧徘徊問樵夫道遠日已暮  
逡巡半塗廢老懶坐自誤悞事豈可常一悔  
生百悟

晚至萬松坪二首

論谷量松不計株參天一片翠模糊  
明朝五老峰頭望又作蒼雲貼地鋪

此中舊有高人住

謂聞極上人

遲我來尋五六年畢竟著書

須擇人間難得好林泉

五老峰觀海綿歌

峭帆昔上鄱陽船我與五老曾周旋兩塵相隔骨不仙  
蹉跎負約十四年近來稍知厭世纏筋力大不如從前  
扶行須杖坐要篋絕境敢與人爭先山神手握造化權  
走入南極分炎躔鞭羊欲從後者鞭假以半日登高緣  
風清氣爽秋景妍芙蓉千丈開娟娟長江帶沙黃可憐  
湖光淨洗顏色鮮背負碧落蓋地圓尺吳寸楚飛鳥邊  
初看白縷生棲賢樹杪薄霄兜羅綿移時騰湧覆八埏  
四傍六幕一氣連滔滔滾滾浩浩然渾沌何處分坤乾

近身扁石履一拳性命危寄不測淵陽烏嗾樸光倏穿  
饑蛟倒吸無留涎以山還山川自川五老依舊排蒼巔  
來如幅巾裹華顛去如解衣袒兩肩酒星明明飛上天  
人間那得留青蓮此時此景幻莫傳頃刻變滅隨雲烟

青蓮谷青蓮寺

饑鷹入山猛如虎掠過松梢攫飛鼠林深谷暗人更稀  
橋斷溪橫道多阻忽逢大石刻三字快若同遊獲徒侶  
前行依舊路茫茫太白書堂在何許三間破屋佛委地



一帶頽垣草沒礎獨來高咏廬山謠白日軒軒欲輕舉  
屏風疊與五老對想像先生舊遊所石梁即是三疊泉  
此景分明在詩語後來著書好穿鑿衆論紛爭吾不與

太白廬山謠有屏風九疊雲錦張銀河倒掛三石梁之  
句元李洞言三石梁在開先寺西黎前言在五老峰上  
或云在簡寂觀及上霄紫霄二峯間桑喬廬山紀事則  
竟以為無如竹林寺之幻境衆說紛然莫知所指今三  
疊泉在九疊屏之左水勢三折而下如銀河之掛石梁  
與太白詩句正相脗合非此外別有三石梁也後人必  
欲求其地以實之失之鑿矣古仙不作誰正之悵望秋雲久延佇

徧遊鈴岡嶺下諸禪室

山僧住山久不道深山好山下每相逢山中跡如掃禪  
居既寂寂過客亦草草林荒鳥語斷葉落寒氣早物外  
識閒情誰能耐枯槁

早發萬松坪

昨登五老峰足力闌輕矯矧投茆舍宿睡美不知曉豈  
惟廢鐘魚林寂少棲鳥起來見晨旭殘月猶雲表山谷  
催早涼陰多晴恐少迨茲好天氣我興殊未了

峇口下山

匡南古道誰開闢懸溜垂絲通一脉劣容半足百八盤  
直注雙眸五千尺靈區再上苦不易步步別山多可惜  
舉頭却望昨所經似到蓬萊今被謫

從萬壽寺經百花園

草烟竹靄午霏霏行盡懸崖接翠微過夏客餐嘗筍去  
隔林僧擔賣茶歸穠花繞砌晴添艷乳水流田土漸肥  
自覺向南風候暖早秋時節尚生衣

淨成精舍懷天然澹歸二禪師時二公俱下世

矣

萬枝脩竹一龕燈  
山外青山又幾層  
有此林巒應著我  
無多文物半依僧  
香前蠹辟繙經案  
鉢底龍眠挂壁藤

紫桂巖前人不見  
秋風猶記別南能

往興澹公別於家  
黃門伯如圃中

三峽橋

陟山須到顛  
尋水須到源  
我從泉源來  
送汝歸山根  
上流九十九  
併力同作喧  
喧前行經玉淵  
盡為潭所吞  
既吞不勝受  
含雪中歆  
急峽跨飛橋  
約束過其奔  
一條天

矯龍中有跌斷痕挾此萬古怒轟轟爭一門遊人不敢  
立足底防瀾翻松風吹細雨到寺將黃昏

棲賢寺阻雨示角子禪師

七尖峰埋烟一塢五老神情皆下俯攜來杖頂昨日雲  
洒作燈前夜來雨石頭路滑不可行遊人早起祈天晴  
禪翁勸我且喫飯同向空堂坐水聲

雨後再至玉淵潭觀水勢

著屐重來又一竒飛流十丈躍龍池不知雨點添多少

跳沫粗於白鷺鷥

白鶴觀舊有唐道士劉混成手植杉東坡先生  
嘗獨遊聞碁聲於古松流水間即其處也

古觀荒荒冷翠交一渠新漲浸堂坳雨眠亂草移蟲窟  
風折枯枝帶鶴巢旂影不飄經院靜棋聲久散石牀拋  
三山路僻人稀到頭白黃冠自結茆

白鹿洞書院紀事四首

古洞盤旋路欲封到門無樹不喬松陰森前後三重殿

突兀西南五老峰，兵火縱教仇典籍。蟲魚何敢蝕蛟龍。

書院中有御賜十三經二十一史及御書二額

睢陽岳麓全荒棄，留得宮墻

儼辟雍

書院舊名廬山國子監

九原可作心相許，千古淵源只數公。大事商量何草草，  
當時位置太匆匆。祠荒勿復論分合，道在終須辨異同。  
祀典也應煩早定，莫令禮樂笑淹中。

前賢餘澤最分明，立法雖良視奉行。幸爾流風綿歷代，  
猶從朔望集諸生。學田籍去官支俸，觀德亭荒士好名。

此日終南非捷徑溪山何負讀書聲

松顛紅鶴早歸來卓爾山前半草萊題扁已更新歲月  
看碑猶辨舊亭臺無端講院人人設何怪儒風日日頽

傳語後來須慎重此間容易著英才

萬歷己卯張江陵  
禁革書院先是常

有紅鶴百十巢於後山松杪其年  
忽去越三年仍來巢書院隨議復

### 鹿眠場

山人陳迹久荒唐石洞新移近講堂  
町疇年年秋草沒

兒童偏指鹿眠場

白鹿石洞明南康守王溱壘石  
為之在彙倫堂後非故處也



左翼山武侯祠

舊來忠節祠何處丞相新堂獨改營

洞中舊有忠節祠  
合祀武侯靖節今

祠廢靖節神位移  
入朱子門人之列

若是此中多序爵故應無地置淵明

循貫道溪南北觀朱文公題志諸石刻

我留鹿洞訪古蹟夜以繼日勤搜羅穹碑無數作林立  
大半剗刻時人多蛇蟠蚓結互相雜頭目眩瞀猶摩挲  
先生姓氏如日月照耀宇宙開山河生平衣履皆可敬  
矧乃手澤存巖阿溪邊巨石見題字小者徑尺大擘窠

自然運用合古法小技不莫隸與科水淘土觸殺節角  
元氣尚自盤蛟鼉誰能撫取置殿壁細辨點畫無差訛  
嗚呼所見母乃小金石非壽道不磨

次韻答白鹿洞生周宸臣並簡學博鄭子充副  
講徐履青

吾生苦失學悔往思補來一經未精通賦命多遭迴  
顏扣名區洞戶呀然開登堂挾浮氣靜者恐見猜此來  
為求友庶幾遇竒才之子杜門處堦前長蒼苔昔年充

國賓羣彥多追陪  
脫身出京洛振步凌崔巍  
為儒務其醇好勇知所裁  
士方處貧賤有識羞良媒  
詞章技尤卑小草殊根荑  
讀書不聞道枯朽安足推  
古來名師儒所以重草萊

出白鹿洞經羅漢嶺下至王陽坂

蒼蒼轉一溪窅窅凡幾曲  
烟中見村落雞犬傍草屋  
阡陌交橫從杭稻雨早熟  
謂言岡路盡豁眼得平陸  
涉澗水急流吾行尚山麓  
循流溯此水來自棲賢谷  
想當暴

漲時發石拔老木兩傍設機碓日可轉百斛此法俗不  
傳勞勞手春粟

萬杉寺贈熙怡長老

慶雲峰麓萬杉寺拓地舊傳天聖中大書鑿石刻九字

寺中石刻甚多悉為僧所踏瘞今惟槐  
京包帚書龍虎嵐慶九字在寺後石上

古殿跨山連百

弓夕陽沉沉南去鳥秋氣颼颼西來風相逢不談戶外  
事吾愛老僧雙耳聾

開先寺

平橋曲磧氣森森門鎖空堂畫轉深

時居僧以斫伐佛印手植松為當事

所逐三門畫閣小史司鎖鑰

鴨脚葉黃僧罷掃麝囊花紫客來尋

寺創

於南唐時山中有麝囊花色正紫中宗嘗植於移風殿名曰紫蓬萊

諸峰瀉瀑層層見萬

木聞蟬步步陰可惜不容吾借榻山南第一好禪林

### 李中主讀書臺

鶴鳴峰勢倚巔岼指點南唐舊石壇畫像影中松葉換

黃山谷開先禪院記有南唐中主畫像及榻存焉

墨池涸後蘚花乾累朝題志

名空在衆口傳訛辨最難

俗傳昭明太子書堂者訛

珍重涪翁留片

碣雨淋日炙恐摧殘

石上刻山谷所書七佛偈

王文成紀功碑

明朝制科號得士吾鄉前輩尤絕倫于公王公後先出  
往往艱大投其身朝廷坐收養士報倉卒定變皆儒臣  
正德己卯夏六月逆濠犯順江湖濱公然舉兵思向闕  
三郡一閔生祆塵皖口駸駸勢將下留都岌岌恐震隣  
是時海宇正清晏武備缺略久不振公方持節撫南贛  
似可觀變徐遭迍同仇大義憤所切守土敢限越與秦

出師必待九重詔是謂以賊遺君親飛書掉羽聲罪討  
攻所不脩真如神自從擣巢及執醜通計時日纔兼旬  
軍門戎首已面縛天子鞅韜方南巡石頭城南獻馘罷  
待命行及明年春周公東征尚跋蹇形跡詎可拘忠純  
盈庭宵小古亦有忌者愈衆節愈伸初心祇期濟國事  
豈必畫像圖麒麟茲山勒銘盖有故深刻歲月題庚辰  
紀功非夸乃紀實書法道勁辭溫醇首從伐叛敘始末  
繼舉神武歸丹宸天方嘉靖我邦國誰其紀者臣守仁

隨征官屬例得列惜哉名姓今俱湮讀書臺傍一片石  
百四十字磨崖新逸事吾聞長老說弘治一榜凡三人  
後來立朝適共事數本前定非無因胡發其奸孫殉難

公乃一手回千鈞

弘治五年吾浙鄉榜公與胡公世寧  
孫公燧同舉其年場中見三巨人傳

為異事及宸濠之變胡首發其奸孫  
以巡撫死難三人共此事亦一奇也煌煌勲業本德性

出遇世會開經綸質諸百世可無惑似此理學寧非真  
後來輕薄好詆毀撼樹不過欺愚民如公表見猶未免  
此外何以加冠巾手磨碑碣發長嘯白日皎皎懸秋旻



題聰明泉傍石上

頑童漱清甘我見謂可惜我旋被彼笑浣手向澄碧人  
苦不自量無端分別多飲牛與洗耳相去能幾何

玉峽亭觀瀑

女媧煉石手年久漏微罅銀河忽垂天峰頂劈二華陰  
寒透毛髮觀者初可怕從來所踞高一跌必就下龍蹄  
爭窟宅思以一戰霸雷霆震嚴冬水電凜炎夏衝成井  
萬丈避去石三舍束身峭壁傍俯視若出跨相持勢難

合棹尾竟傾瀉來者競喧囂逝者已代謝風林延靜聽  
漸遠似分汊縹縹絲車鳴泱泱糟床醉盡平震蕩心坐  
以觀物化

萬竹亭

孤亭避玉峽一徑幽篁裏鑿斷籜龍根石槽方吐水

五乳峰下望黃巖瀑布

五峰融乳氣流濕一穴洩雲聲滿空落日正懸高樹杪  
行人却在雨絲中

歸宗寺次穎濱先生舊韻

遙瞻孤塔近聞鐘又到金輪第一峰五老烟霞猶在眼

六朝風景獨留松

寺為王右軍捨宅

鵝池細合簾泉派鸞水涼

分茗盃供歷徧名藍茲最古夕陽簾閣影重重

登右軍閣

右軍高閣俯碧渠古木漾影交扶踈迴廊灣濼得幽趣  
高有飛鳥潛有魚此間臨池頗自可我腕有鬼不善書  
作詩亦欲題壁去擲筆一笑成墨豬

鸞溪

二老風流路未迷青松名與白蓮齊若將山水平情較

似覺鸞溪勝虎溪

元豐中周濂溪先生與真淨文禪師於此結青松社人以之比虎溪云

寄題簡寂觀十四松

梁時碑記

梁沈璇有簡寂觀記

晉時松十四株如十四龍約汝重

來吾不負好留鱗甲待吟筇

從粟里渡柴桑橋至鹿子坂訪醉石觀靖節祠

陶公家柴桑地本接粟里高賢棲隱處土物覺清美風

翻紫芋苗雨綻紅蓮米平坡樹簇簇枉渚波瀾瀾徘徊  
山東南何處訪故趾逢人輒問姓覬遇陶氏子但見卮  
角翁叱牛入烟裏先生在當日逃祿如脫屣至今山下  
柳尚識折腰恥肯令後世名人人得輕指聞風感頑懦  
即此可以起

圓通方丈與杲菴長老夜話

到門山壓樹冒石水衝橋古殿防頽塌閒房取寂寥齋  
鐘秋後準燈盞夜深挑尋遍峰峰寺高僧不在遙

月下步入隣菴同杲公

尋山翻苦忙忽忽度長日徘徊良夜清景殊未畢隣  
僧閉門早避月不肯出客來扣柴門帶月入爾室空堂  
琉璃暗古佛黑如漆不有好事人清光為誰溢

尋夜話亭一翁二季亭故址皆不得戲示杲公  
十里無端枉道來歐蘓陳蹟委蒿萊人間好事誰如我  
博得圓通一宿迴

渡石澗橋欲遊石門精舍不果

客從山中來嵐氣濕巾帽北尋黃龍潭南送白水漕

五老

峯下澗名  
讀作去聲

石門路非遠一澗流浩浩翻以耳目前行踪

未經蹈吾將賈餘勇直入窮閭與謀及道旁人競以險  
惡告或云林黯黈或云石鴛鴦或云夔罔兩遇者恣凌  
暴或云採樵叟壯年曾一到白頭每追悔相戒勿再造  
或云天池僧亦曾宅崖隩荒寒難久住苦舍隨欵倒爾  
來更誰繼竒險敢輕冒老夫為躊躇獨聽奪羣譟迴思  
謝康樂鑿山每開道當時築精舍物力豈空耗不得從

之遊悵然違所好

廬山雜咏四首

食豆兼食苗 豆苗瘦如縷 不聞豆花香 惟帶豆葉苦

豆葉

菜

老鴉銜茶子 墮石久成樹 何必百花園 峰峰有雲霧

林間

茶亦名

雲霧茶

誰遣冒松名 而長三寸許 山頭有蓬藿 俯視猶傲汝

萬年

松



山花合在山幽谷尋難見却笑紫蓬萊愛入移風殿

薈

花

遊山歸錢越秀呂灌園出示見送詩戲答二首

一卷新詩吟不盡歸來只與未遊同野人胸次無宿物  
好景仍在廬山中

千古才難洵不疑敢將輕薄入文辭眼空除是東坡老  
笑得徐凝瀑布詩

自題廬山紀遊集後

半生讀書不得力浪走風塵嗟暮色名山五岳杳無期  
此日匡廬面初識千秋物象遞顯晦幾輩閒人肯登陟  
謫仙頭白倘歸來白石清泉聞太息獨移瘦杖扣石鏡  
雙眼快對晴空拭已知絕境少豺狼那怕荒蹊犯荆棘  
鴉飛不到力有限龍起無時神莫測橋邊聽瀑雨淙淙  
峰頂看雲松叟叟三秋忽變候寒暑半月略盡山南北  
偶然興至或留題聊藉微吟豁胸臆詩成直述目所覩  
老矣焉能事文飾仙靈幽秘苦雕剗雲霧蒼茫每深匿

忽逢生客一呈露可惜無才收不得歸途鹵莽方自嗤  
遊况匆忙誰見逼人間涉歷多梗滯祇此一途猶未塞  
皇天亦似憫汝窮恣爾窮探無吝嗇如何汲汲向城市  
若赴嚴程拘漏刻他年終伴采芝翁臨別有言吾敢食

敬業堂詩集卷十五

欽定四庫全書

敬業堂詩集卷十六

翰林院編修查慎行撰

客船集

起壬申九月  
盡十二月

樂天琵琶行自述遷謫之情託於送客而不著其  
姓字未必果有其人也今余與恒齋別正值楓葉  
蘆花之候恒齋官况不異左遷別後倘有詩見及  
其母使人疑此客為烏有子虛乎

留別恒齋太守次見送原韻

小住衙齋忽半年河梁只在一尊前  
重携風雨登山屐又上江湖載酒船  
有此別離成我老無多才調感君憐  
蘆花楓葉殘秋路不聽琵琶亦黯然

鎖江樓下再與恒齋別

聚散真無奈行期已數更不緣歸路遠  
翻遣別愁生潮到潯陽縮江過皖口  
平戍樓今夜月相送比君情

早發湖口縣

山色滿空城，蒼烟帶曉晴。  
舟人辨風信，關吏候雞鳴。  
湖勢三秋減，江流九月清。  
半年經六度，此度是歸程。

初秋與恒齋住舟彭澤，余有七月初三日五律一章重經此地，屈指六十日矣，聚散之感愴然入懷，再作一詩附九江後信。

小縣江天豁，西南月吐鉤。  
轉頭如昨日，撫景忽殘秋。  
路改攀罽岸，燈明隔浦舟。  
烟波三宿夢，猶自戀江州。

舟過大雷岬二首

雲收霧散來時路奇險初欣過馬當風日晴和秋澹蕩  
江山平遠入微茫畫圖側畔移帆影明鏡中間耀眼光  
合與詩家添好句不然辜負薄遊裝

荒洲夾岸沉漁蕪小市臨流颺酒旗去舫校多來舫少  
遠山不動近山移鷗憐故侶行杭音相傍雁折斜風字亦

奇一事歸人獨惆悵匡廬西望已迷離

夜抵黃石磯

過盡魚罾蟹筍邊依稀村落在山前半江烟霧半江月



一隻夜深歸客船

搭魚詩 有序

沿江捕魚者碇小船急流中截竹二尺許緡而不鈎  
繫豕肉作餌兩人對把一竿隨放隨收鱖魚長二三  
寸者應手而出稍緩則吞餌逝矣日可得數十斤名  
曰搭魚曝乾加紅麴為鮓鬻於寧國山中

昔讀魚具詩纖悉苦難曉今來江湖畔意外駭機巧竹  
竿二尺長芳餌繫其杪曲鈎渾不用緡直影隨表滅滅

水聲中鱗鱗出白小有如拾蚌蛤一一向盆沼十不失  
二三得心手馴擾自從罔罟設水族久莫保此法古未  
傳吁嗟更誰造庖厨窮口腹物命例短夭有情為惻然  
放筋吾忍飽

早過大通驛

夙霧纔醒後朝陽未吐間翠烟遙辨市紅樹忽移灣風  
軟一江水雲輕九子山畫家濃淡意斟酌在荆關

重登銅陵太白樓

千古奇才一謫仙  
當時寂寞後人傳  
誰憐我是題詩客

淪落江湖十四年

已未夏余曾題  
詩樓上今尚存

天門山

北望采石磯  
南望蕪湖關  
蒼茫裕溪口  
豁達天門山  
長江萬里來  
近海勢逾寬  
到此一約束  
帖然成安瀾  
秋空

掃濃綠  
兩道蛾眉彎

亦名蛾眉山

弦月帶衆星  
盡歸吞吐間

亂帆不自整  
散落鷗鳧灘  
浮雲本無程  
日暮相與還  
我行何處泊  
前路方漫漫

采石舟次喜遇介菴叔即送其游楚

半載家書斷逢君喜欲狂  
細微談近事安慰當還鄉  
別夢吳船隔征途楚水長  
忍辜今夜酒明日況重陽

九日三山舟中有懷德尹近得家信聞弟已渡  
淮

夾岸蘆花作絮飛  
鯉魚風急客添衣  
從來節物悲遊子  
如此江山送落暉  
鄉路尚成千里隔  
別時原約半年歸  
誰能料得貧家事  
去住無端與願違

重泊秦淮二首

袁家鵝鴨薛家羊不問當壚賣酒孃懊惱一秋無菊者  
楚人船上過重陽

市樓南北酒帘青市上游人半醉醒何暇管他亡國事  
更將閒淚洒新亭

金陵早發

東方大星射芒刺一片江光白如地去城未遠尚聞鐘  
烟柳濛濛六朝寺

登燕子磯

迴欄步步轉雲汀若要登高更有亭  
淮岸柳條秋尚綠孝陵松氣遠尤青  
城啣日出排鴉陣天偏江低響雁翎  
添得重來多少恨西風吹帽鬢星星

憶興籍荒兄泊舟  
觀劇屈指十三年

矣

同譚護城給諫飲朱十兄竹垞齋席上分賦

檣燈塔火照城闈  
儼屋依然近作隣  
九陌並回三載夢  
一官難救五湖貧  
飽經世故初心在  
畢竟交情老輩真

慚媿為歡煩二主買魚配酒餉歸人

題鄭春薦廬墓園

舊來宰木已參天書帶重生丙舍前多少康成門下士  
一時俱廢蓼莪篇

題朱北山西溪梅花圖卷

一篙寒水平盃綠松木塲西凡幾曲春頭臘尾萬梢梅  
照影橫斜散冰玉花時一一為我有別業西溪曾卜築  
廿年不到漸踈蕪借與隣僧挂瓢宿上番大雪凍連月

聞道摧殘到松竹可憐老幹刺槎枒有似佳人在空谷  
對君此畫增健羨蟠螭龍蛇歸尺幅欣然意到不留手  
偶爾圖成聊寓目春烟欲動氣葱葱夜月斜穿光燭燭  
略施朱粉紅間白力挽冰霜骨勝肉恍如幽夢向溪山  
洗盡胸中筆端俗我今倦遊百事廢一壑能專良易足  
相將同賦歸去來花氣浮餅酒應熟

再題霜林秋晚圖卷

長風入林瘦蛟舞萬葉低昂爭仰俯劈開玉峽飲晴虹



倒射霜空撒紅雨中間幾株尤耐霜濃者得綠淡者黃  
興酣渲染出真意綃素絢爛凝秋光瀟湘洞庭多變態  
放筆知君與神會披圖莫作咫尺觀別有蒼茫在圖外

王令詒過村居小飲限韻各賦二首

十年出求友時輩方縱橫與君非苟交結托重老成所  
以我諸弟事君亦如兄每聞君造廬一一皆歡迎且須  
惜此意勿作匆匆行

湓城得家書送爾倍惆悵

初秋與令詒別於九江

吾舟未東下吾

弟方北嚮同時忽同歸

余到家半月  
德尹亦歸

事固未易量喜君

復見過此會出非望所嗟不盡歡隣喪春不相

荆州兄  
方丁太

夫人艱  
故云

無計獨留君燈前北風漲

題陳言揚抱膝圖二首

使君與僕孰英雄寄託如何不約同此意沈吟應共惜

半生光景畫圖中

與君識面從兒穉不覺形容漸失真同是庚寅吾獨老

始憐衣上十年塵

余與言揚  
皆庚寅生

再題言揚者舞圖

舞袖雖長不自持歌喉縱好有誰知賞心或在人情外  
看取停歌罷舞時

維揚談締初亡兄韜荒堦也今來就婚投詩見  
贈感賦一首

吾嫂持門戶吾兄肉已寒夢為雲聚散愁見月團圓得  
堦如君少為甥似舅難十年存歿泪相對不禁彈

廣讓寄南燭子詩索和戲作一首

曹家二尺紅珊瑚霞光照耀開座隅李倫如意不敢擊  
變作顆顆勻圓珠冰霜太寒雪太白可少丹砂點顏色  
綠毛么鳳愛梳翎尾重身輕飛不得

斷硯歌寄和姜西溟

姜侯才高同屈宋往往彈冠讓王貢舉場老負十上名  
史館貧支廿年俸硯田一片羞自給略似良農勤執種  
為言此石初得時愛與端瓊稱伯仲  
端瓊亦西溟藏硯每因拂  
拭誇朋友未許收藏付僕從平生不以文滑稽滴露研

硃事修綜窮經恥勿草太玄給札雄堪賦雲夢不知磨  
耗幾挺墨書到成家筆方縱可憐尤物難久完識者何  
希忌何衆秦城十五不輕易博浪一椎翻誤中有情那  
免號癡絕足削荆和抱深痛唾壺口缺琴尾焦笑此依  
然配清供作詩聊用解客嘲屬和無端邀我共我今所  
見與君異嗜好心空色不動膠腴漆附終有痕來詩有  
膠腴漆  
附太堅  
綴之句豈比天生本無縫勸君撥棄勿復道瓦礫寧當  
較輕重君苗焚硯古有諸持此區區欲安用

並轡集

起癸酉正月盡三月

余以新正東裝北上德尹初未有出門之約二月杪忽相遇於淮上遂偕翁康飴嚴定隅並轡而北通計一春所作無過三十餘章皆行役之詩也故彙成一編

春夜飲曾濟蒼宅同徐淮江

春波門外如鉤月六里長街未上燈花徑初除三尺雪  
雅人相對一壺水窮愁老境尤貪酒樂事新年在得朋

從此兩湖添地主

余向寄徐淮江詩有兩湖地主惟君在之句

每逢高會約

徐陵

貽笏圖為徐淮江賦次李武曾韻

徐家手版傳忠襄曾隨封事携皂囊牙花欲開天變候  
雷雨白日椽谿堂堂中書籤三萬軸一一玳瑁琉璃裝  
牀頭置笏床下拜髣髴排擊含風霜自從尚書殉社稷  
對命無復王廷揚問君實此竟安用謂是祖德貽縹緗  
君家祖德非尋常日星皎皎懸孤光百年朝典存手澤

世閱兩代源流長公侯子孫必復舊瓜瓞綿邈今方將  
鳳雛已得韓冬郎七歲弄筆吟繞廊丈夫生兒有如此  
用少陵徐卿  
二子歌中句對客那得能深藏塗鴉畫虎無不可但是  
驥性終馴良乃翁與世不同調挾筴莫歎亡羊臧摩挲  
老眼待他日為汝持笏還端詳

吳門程汝諧乞詩為節母孫太君壽

古人乞言重名義今人乞言重勢位數篇排比達官名  
滿幅雷同錦屏字程生壽母乞我詩我名微賤世莫知



感生厚意惜不得但愧窮老無妍辭區區持贈一言耳  
非此母不生此子我為此語豈無徵試問南湖老居士

汝諧出老友盛鶴江  
之門故落句及之

### 再題東湖弄珠樓壁

滿湖新漲綠如油五度凭欄記此樓粉壁有詩僧代掃  
青衫無趣客重遊花邊舊事閒相觸醉裏風情老漸休  
多謝柳條長短意尚含烟雨拂孤舟

### 鄧尉山看梅與譚護城都諫分韻

買帆下吳閭晨夕風雨對掀蓬喜開霽決起逐儕輩明  
波洗雙眸遙見峰染黛橋低榜梢進竹密步微碍紆徐  
入玄墓梅信行已逮古榦無醜枝踈花有餘態寧知山  
近遠漸覺路茫昧濃日散晨光千林同一概蒸蒸氣浮  
動靄靄香奔潰人聲絲竹聲多在白雲內居僧揖冠裳  
游女曳環佩青紅小姬姹紛若魚同隊見花嬌不憐手  
折髮邊戴本為冷澹遊喧沓性叵耐翻身暫引避穿徑  
出荒穢前登馬家山高出萬花背境荒人罕到鑿石初

破塊自然愜幽趣真景非粉績僕本住山人無端走闕  
塞故園三百樹先植記好在有花不得看既出每深悔  
此來復何幸夙願償意外神交契新賞老戀割私愛俗  
腸既蠲除塵面一盥頽近將營半畝斷地把耒耨未君如  
娛晚計共買花邊埭歸田事不難所要在勇退惜哉迫  
行役各與初心偕解纜復跼蹐清遊幾時再

過葉已畦二棄草堂出新刻見示

疊成山勢鑿成窪位置柴門趁屋斜小築人皆稱得地

遠來吾不為者花舊遊歷歷經心眼餘論津津溢齒牙  
未敢對君談著述十年衣袖有塵沙

吳門勞在茲為余作畫冊

自題佳句寫雲烟不獨詩仙畫亦仙筆墨我緣人品重  
聲名天許布衣傳家留林壑藏書屋

君為洞庭  
西山人

春在江

湖采藥船老覺塵埃真少味相逢猶話住山年

常熟過錢玉友河亭

時玉友亦  
將入都

薜荔交陰覆短墻詩人居近芡菖房俄驚小別成三歲

直訝相逢在故鄉兒摘畦蔬供午饌婦藏斗酒佐春觴  
祇愁旋被饑驅出未必家餘住夏糧

大石山房

西城樓閣為  
虞山絕勝處

又作西城半日留短筇筋力試山遊愛隨雲氣穿仙掌  
笑挿花枝上佛頭三面城根三面水一層樹杪一層樓  
人情那得能知足好景多貪極目收

留守瞿相國春暉園

不知頽廢自何年一片傷心到目前戰後河山非故國

記中花石尚平泉烟埋平碧迷芳草血染春紅化杜鵑  
狼藉南雲憑檻外愁看白日下虞淵

拂水山莊三首

名園未到已神傷指點雲山入渺茫老屋尚支秋水閣  
墓田新拆耦耕堂藤陰漠漠餘花紫梧徑離離夕照黃  
猶有游人來買醉兩湖烟月屬隣莊

滄桑殘局等閒分野史亭邊日易曛異代文章歸紀述  
盛時裙屐屬傳聞畫圖夢蝶尋紅豆書劫焚魚感絳雲

留取舊栽花木在罷官還說李司勳

松圓為友河東婦集裏多編唱和詩生不並時憐我晚  
死無他恨惜公遲崢嶸怪石苔封洞曲折虛廊水瀉池  
惆悵柳圍今合抱攀條人去幾何時

瓜洲大觀樓張見陽郡丞屬題

柳梢城角影毵毵烟放桃紅水放藍到此忽驚身是客  
捲簾江北望江南

秦郵舟中紀事

截斷湖光別作隄一條荒影巨虹蜺居民飽食黃河鯉  
客飯愁添濁水泥不解天心何日轉若論地勢向來低  
誰憐禹貢揚州域急挽東流更向西

魚溝看桃

一村桃間一村柳日氣射花紅撲鞍此事今年真過分  
江南江北兩回看

與德尹同坐驢車戲作二絕句索翁康貽嚴定  
隅和



淮浦相逢事太奇  
小船同載蹇同騎  
與君便是同功繭  
不許人間有路岐

抵足朝朝作卧遊  
欠伸一笑兩擡頭  
擊殘車壁殊多事  
鼠穴前頭夢八騶

德尹詩有一龕恢恢之句用其意再作一首

別茅菴出已多年  
又結津梁道路緣  
添個蒲團相對坐  
也如行脚也參禪

從峒嵒騎驟至紅花埠

峒嶠小驛勃姑啼路入徐州漸向西若要看花須趁早  
防他一雨便成泥

雨阻紅花埠

衝風衝雨衝波浪瞥眼江湖十載餘肯信壯心銷便盡  
一鞭泥滑怕騎驢

望蒙山同定隅德尹作

疊翠浮嵐不記重羣山絡繹走蒼龍若論舉眼人人識  
只有知名一兩峰

道傍見螭轉丸

不知何意轉成圓  
糞壤生涯大可憐  
翻似向人誇絕技  
一丸突過馬蹄前

望岱

一朵雲扶一朵蓮  
蓮花頂上即青天  
可能膚寸為霖雨  
今是乾封第幾年

至河間聞彭椒嵒量移之信留詩寄之

八載循良吏初遷  
本分官敢云從政  
易轉覺致身難  
客

路雖相左離愁此暫寬  
一春傳旅食今日為加餐

次新城先生壁間韻

餅鑪酒店兩三間  
塵壁題名記往還  
留得和詩人小住

綠楊簷角鳥關關

曉過趙北口

十里風埃過鄭州  
忽開雙眼見清流  
綠楊影裏平橋路  
數盡漁船數白鷗

題王赤孖籬豆畫卷二首

豆葉翻翻豆莢肥  
檐前穀穀草蟲飛  
故園秋意忽到眼  
一陣野風吹客衣

沿籬手種兩三莖  
引蔓垂梢漸滿棚  
生被畫家偷樣去  
帶花拗折一枝藤

送趙子晦之任延津二首

青袍謁選十三年  
此去雙鳧便是仙  
滿眼簿書非俗物  
太行山在印牀前

車笠相逢兩不猜  
湖湘分手又燕臺  
參軍一老今頭白

重與郎君贊畫來

謂彭南陵

次韻酌唐實君喜余入都之作

吹得楊花作雪飛  
帝城春事已全非  
桐經爨後孤絃絕  
鐵化魚來尺素稀  
東閣何期今再到  
故人長恐見無幾

詩楚茨疏  
幾期也

白頭賸爾如新在  
縞帶猶堪博紵衣

附原作

唐孫華

客散梁園墜雨飛  
尺書驚見是耶非  
鄰房燈火鳴雞  
杳岐路雲山候雁稀  
飲酒人非攻子美  
改名君且學

劉幾長須叩戶吾遙識蚤晚將迎辨倒衣

初夏同叔毅定隅霜巖德尹坐一莖菴後香林

亭

一窖黃塵沒馬蹄喜從塵外得招提出墻僧梵風吹斷  
拂面花枝鳥壓低溝水欲流亭影去夕陽忽到柳陰西

浮萍落絮同飄散閒繞空廊覓舊題

已巳秋與竹垞  
水村兩遊此

淶水亭與唐實君話舊

鏡裏清光落檻前水風涼偏鷺鷥肩菰蒲放鴨空灘雨

楊柳騎牛隔浦烟雙眼乍開疑入畫一尊相屬話歸田  
江湖詞客今星散冷落池亭近十年

偶閱楊次也賣花詩戲次原韻五首

先從槐樹斜街過旋到慈仁寺裏來淺綠深紅春四季  
跨驢騎馬月三回

分明已過早春時駘蕩風光不自持大抵人情誇爛熳  
斷無人賞未開枝

帶來春色三分土吹過風頭一闕塵莫認園丁作園主



種花人是賣花人

白白朱朱漫作堆  
舊家亭館記曾栽  
閱人最有花兒匠  
及見園空長綠苔

草本經年易長成  
豐臺美種一時并  
當初芍藥原名貴  
莫以花多便見輕

次韻答實君

被褐時方輕垂綏  
古有戒匪材等樗櫟  
不熟讓稊稗感  
君勿我棄假館同  
瀟灑城隅積水潭  
浩汗滙衆派禾苗

綠油油牕戶明噲噲棄之為馬廐放眼靡所屆庶幾東  
閣中得土稱一快吁嗟及時事忿恚疑近隘各隨出處  
緣並守廉隅界短檠光煜煜缺月東南挂對床連夜語  
里耳竊聽怪非無蛙聒噪亦有鼠黠獍集泮本好音飛  
鴉吾豈解孤生分衰賤舊業棄土崩腰非長揖具况肯  
望塵拜誰能將肺肝穢怒供裂眦鈞鈞聽曲直碁局付  
成敗似聞逐客議振觸動機械時臺中有條議國學  
主回本籍鄉試者世  
或指鷹鷂吾其避蜂蠆國家有大計草野腕徒溢言官

例毛舉通病詎能瘥公卿非不知相視各噤斷可憐文  
廟栢祇用便馬疥騷除由廡下梁木孰支壞議難決一  
朝吞吐苦不嘔將毋國體傷識者為深喟君詩雖有激  
風義實誥誠布衣何足云道路未償債炎埃蔽赤日六  
月迫行邁山田歸及耕書籍行當賣勞筋應自息倦羽  
非人鍛得喪心已空須彌堪納芥

附  
原作

唐孫華

名士今幾人世方以為戒良玉混武夫嘉禾雜粃稗

君才固卓爾盛製富揮洒崇山俯培塿溟渤吞衆派  
魯邦久卑邾淮陰豈伍噲長安踏槐花賓興期已屆  
如君得數人制科誠一快吏議聞逐客斯舉亦已隘  
如何辟雍中輒畫鴻溝界網羅失長鯨敵苟愁空挂  
厲階誠有由壞事因鬼怪昔者夸毗子紛紛逞狡獪  
伸喙餘三尺臨文無半解惡草等葦菴微材僅菅蒯  
豈有鄉里交但下倉荒拜大德忘丘山小怨結睚眦  
射羿弓旋彎會洹盟屢敗對譚語設筭默坐心藏械

螫手類蝮蛇嚼肌甚蜂蠆奪利腦競監爭門臂各搯  
猥險成世風積疾何由瘥所以當塗人疾視久喋斷  
驅使歸井閭淨若除癬疥高墉惡雀穿長堤緣螳壞  
世遂嗤空名畫餅不足噉因噎遂廢餐此事可一喟  
君性本冲和三緘夙自誠流落坐詩窮羈棲負酒債  
遇合會有時慎勿嗟行邁錦段久織成何處不可賣  
虎氣有時騰鸞翮無長鍛一名轉瞬成行者拾地芥

題陳履仁登車圍小影

手拂雙花五鬣雲  
世家文采孰如君  
八駟四望尋常事  
只要來空薊北羣

題顧書宣畫冊竹筓水仙二種

南去嘗雞縱  
北來食松繖  
指與紅竹菇  
畫中添土產

雞縱

產真南松繖產勞山  
宜興山中  
有紅竹菇

老根如蒜頭  
大葉如蒜苗  
欲抽一寸心  
待此冰雪消

敬業堂詩集卷十六